

13-15 DECEMBER 2022

KIGALI CONVENTION CENTRE



SECOND INTERNATIONAL CONFERENCE ON PUBLIC HEALTH IN AFRICA

PREPAREDNESS FOR FUTURE PANDEMICS AND POST-PANDEMIC RECOVERY: AFRICA AT A CROSSROADS

Muhtasari wa Kutuma Ikisiri za CPHIA 2022

Maelezo ya Jumla

Kuhusu CPHIA

Kongamano la Pili la Kila Mwaka kuhusu Afya ya Umma Afrika (CPHIA 2022), lililoratibiwa kufanyika tarehe 13 hadi 15 Disemba, litatoa fursa ya kipekee kwa watafiti, watunzi wa sera na wadau wa Afrika kujumuika pamoja ili kubadilishana maono na matokeo ya utafiti katika afya ya umma, huku wakianzisha enzi mpya ya ushirikiano imara wa kisayansi na uvumbuzi katika bara zima. Kwa kuendeleza matokeo ya CPHIA 2021, kongamano la mwaka huu litatumika pia kama kichocheo cha kubuni mifumo thabiti zaidi ya afya inayowezesha nchi za Afrika kujiandaa vyema na kudhibiti matukio hatari ya afya yanayoibuka, huku pia likishughulikia magonjwa ya kuambukiza ambayo yamekuwepo kwa muda mrefu.

Wito wa Kutuma Ikisiri: Waandalizi wa CPHIA 2022 wanafurahi kuomba ikisiri kuhusu nyanja zote za kongamano kutoka kwa washirika wowote husika.

Mada: Ikisiri zitakazokubaliwa zitahusu nyanja zifuatazo za kongamano:

- **Uwanja wa 1:** Epidemiolojia, Uchunguzi na Udhibiti wa Kimatibabu wa Magonjwa ya Kuambukiza Yanayoibuka na Yanayoibuka Upya yenye Athari Kubwa (HCID), barani Afrika.
- **Uwanja wa 2:** Kuongeza uzalishaji wa ndani barani Afrika: Uwezo wa Utetezi, Utafiti na Maendeleo katika Uchunguzi, Tiba na Utengenezaji wa Chanjo.
- **Uwanja wa 3:** Kuimarisha Mifumo ya Afya kwa ajili ya Kutoa Huduma za Afya kwa Usawa na kwa Jumla barani Afrika
- **Uwanja wa 4:** Wanawake KATIKA Huduma za Afya - kuanzia wapokeaji, watoa huduma hadi viongozi
- **Uwanja wa 5:** Janga la COVID-19 – Mambo Tuliyojifunza kuhusu Matukio Yanayohatarisha Afya, Uzuiaji, Utayari na Kukabili katika Siku Zijazo
- **Uwanja wa 6:** Huduma Dijitali, Miundo na Takwimu za Kuleta Ufanisi katika Kukabili Masuala ya Afya ya Umma, kuanzia Mikurupuko hadi Majanga na Zaidi
- **Uwanja wa 7:** Jamii nzima – manufaa ya kushirikisha mashirika ya kiraia, wadau wa jamii na sekta ya kibinafsi
- **Uwanja wa 8:** Mtazamo mpya kuhusu magonjwa makuu ya kuambukiza barani Afrika: VVU, Kifua Kikuu (TB) na Magonjwa ya Kitropiki Yaliyopuuzwa (NTD)
- **Uwanja wa 9:** Magonjwa yasiyo ya kuambukiza – tisho endelevu kwa afya ya umma Afrika

Ustahiki wa Ikisiri na Waandishi: Ikisiri zilizo na kazi asili katika nyanja zilizo hapo juu ndizo tu



zitakazokubaliwa kwenye kongamano. Mwandishi wa msingi lazima awe ameshiriki katika shughuli zilizotajwa kwenye ikisiri na kupata vibali muhimu vya serikali ambapo data nyeti inatumiwa kwenye ripoti, pamoja na hati zozote zinazofaa mahitaji ya uadilifu.

Ingawa mtu anaweza kutuma zaidi ya ikisiri moja, tutakubali tu ikisiri moja kwa kila mtu (mwandishi wa msingi). Utafiti unapaswa kuwa umefanywa katika kipindi cha 2020-2022 ili kuhakikisha ufaafu kwenye mazingira ya sasa ya Afrika. Ikisiri ambazo ziliwasilishwa mahali pengine hapo awali zitazingatiwa kwa hiari ya jopo la uamuzi, lakini kipaumbele kitatolewa kwa ikisiri ambazo bado hazijawasilishwa kwenye kongamano lingine lolote la kisayansi. Waandishi wanapaswa kusesitiza jinsi kazi iliyofanywa ilitumiwa kuleta athari inayofaa kwenye mazingira ya huduma ya afya na/au jinsi utafiti utakavyobadilisha huduma za afya ya umma katika siku zijazo.

Uchapishaji katika Jarida la Afya ya Umma Afrika: Ikisiri zote zinazokubaliwa zitachapishwa katika Jarida la Afrika la CDC la Afya ya Umma Afrika (Journal on Public Health in Africa).

Mawasilisho ya Moja kwa Moja na Ukumbi wa Mabango: Mkutano wa CPHIA 2022 utakuwa wa ana kwa ana. Watu wote wanaotuma ikisiri, iwe wamechaguliwa kwa mawasilisho ya kuzungumza au ya mabango, wanatarajiwa kuwa na uwezo wa kuhudhuria kongamano katika mji wa Kigali ikiwa watachaguliwa.

Ufadhili wa Ikisiri: Huenda kukawa na idadi ndogo ya ufadhili wa kulipia gharama za usafiri kwa watafiti chipukizi, na utaombwa wakati wa mchakato wa kutuma ikisiri, uteue kisanduki ikiwa ungependa kuzingatiwa kupata usaidizi huu. Hatua ya kuomba usaidizi huu itakuhitaji utume ombi pamoja na ikisiri yako. Hata hivyo, tafadhali kumbuka kuwa kutuma ombi la usaidizi kama huo *haimaanishi* kuwa CPHIA itaweza kukufadhili. Hakuna ufadhili utakaotolewa kwa wanaotuma ikisiri ambao ikisiri zao hazijachaguliwa kwa mawasilisho ya kuzungumza au ya mabango. Wanaotuma ombi wataarifiwa ikiwa wamepata ufadhili wowote pamoja na taarifa ya kukubaliwa au kukataliwa kwa ikisiri zao.

Ukinzani wa Maslahi: Waandishi wa ikisiri zilizokubalika watalazimika kutuma fomu ya ufichuzi wa ukinzani wa maslahi ambayo itaambatishwa kwenye barua ya kukubali ikisiri.

Tarehe za Kutuma Ikisiri

Waandishi wanapaswa kupakia ikisiri zao kupitia [jukwaa la wavutini uwasilishaji wa Ikisiri la Oxford](#). Iwapo utapata matatizo katika kutumia jukwaa hili, tafadhali wasiliana na CPHIA2022Abstracts@globalhealthstrategies.com.

- **Ufunguzi wa wito:** Kipindi cha kutuma ikisiri kitafunguliwa, tarehe 15 Agosti 2022
- **Tarehe ya mwisho ya kutuma:** Tarehe ya mwisho ya kutuma ikisiri ni Ijumaa, tarehe 30 Septemba 2022 saa 5:59 usiku, EAT (Saa za Afrika Mashariki). **Hakuna ikisiri zitakazokubaliwa baada ya tarehe rasmi kupita.**
- **Utathmini:** Ikisiri zote zitakazotumwa zitakaguliwa na angalau wakaguzi watatu huru
- **Kukubaliwa:** Wanaotuma ombi wataarifiwa kuhusu hali ya kukubaliwa ifikapo **Jumatatu, tarehe 31 Oktoba 2022**

Muundo wa Ikisiri



Idadi ya maneno: Ikisiri haipaswi kuzidi **maneno 300** (ambayo yanajumuisha mada ndogo lakini hayajumuishi mada, maneno muhimu, orodha ya waandishi na anwani zao).

Waandishi: Waandishi wanapaswa kuorodheshwa kama ifuatavyo:

- **Mwandishi wa kwanza:** Andika jina la kwanza, herufi ya kwanza ya jina la kati (ikiwa lipo), na jina la mwisho (k.m., Henry M. Kuku).
- **Waandishi wenza:** Orodhesha kila mwandishi mwenza kulingana na mchango wake kwa kuandika herufi za kwanza za majina yake ya kwanza na ya kati, zikifuatiwa na jina kamili la mwisho (k.m., J.N. Toto, C.H. Kwakwari).
- Andika uhusiano wa kimashirika kati ya mwandishi wa kwanza na waandishi wenza wote.
- Onyesha mwandishi husika kwa Kinyota* na uweke anwani ya barua pepe na nambari yake ya simu pamoja na anwani zake mbadala.

Maneno muhimu: Tafadhali jumuisha maneno 4 – 6 muhimu

Mada: Mada inapaswa kuwa ya kuelimisha lakini iwe kifupi bila mada ndogo au vifupisho/akronimu na inapaswa kuangazia - mada/utafiti unahusu **nini**, ulifanyika **wapi** na ulifanywa **lini** (k.m., Kundi la visa vya COVID-19 katika wilaya ya Keke, Agosti 2020). Andika mada katika muundo wa sentensi na uandike tu herufi ya kwanza ya nomino za kipekee na majina ya kisayansi kwa herufi kubwa pale inapofaa (k.m., *Plasmodium falciparum*).

Utangulizi/Usuli: Shughulikia utangulizi wa kisayansi, mantiki ya utafiti, pamoja na umuhimu wa mada kwenye afya ya umma. Kwa sababu ya uanuai unaotarajiwa wa wakaguzi na wahudhuriaji wa kongamano, usichukulie kuwa kila mtu atafahamu mada yako. Fafanua kwa nini utafiti wako ni muhimu na maswali ambayo utafiti utajibu. Utangulizi uliobainishwa vizuri huvutia hadhira na unapaswa kujumuisha:

- Maelezo mafupi ya mada na umuhimu wake kwa afya ya umma
- Malengo ya utafiti
- Maswali ya utafiti au nadharia tete ya utafiti ikiwa inatumika

Mbinu: Eleza mbinu zilizotumika kwenye utafiti. Hoja muhimu zitakazojumuishwa ni pamoja na:

- Muundo wa utafiti
- Mazingira ya utafiti
- Demografia iliyofanyiwa utafiti
- Vigezo vya ustahiki na ufafanuzi wa vielelezo, ikiwa vipo
- Ukubwa wa sampuli na mbinu za sampuli
- Udhhibiti na uchanganuzi wa data

Matokeo: Onyesha matokeo muhimu (mazuri na mabaya) ya utafiti ambayo yanahusiana moja kwa moja na malengo ya utafiti. Sehemu hii **haipaswi** kujumuisha majadiliano ya matokeo. Andika nambari kamili na asilimia/ikisami, viwango na uwiano wake panapohitajika. Tafadhali kumbuka, kwa kuwa ikisiri ni hati inayojitegemea na inayoweza kudondolewa, sehemu ya matokeo inapaswa kujumuisha data. Haipaswi kujumuisha kauli kama vile “Data itajadiliwa.” Ikiwa kazi kubwa bado haijakamilika kabla ya kutuma kwenye kongamano, tafadhali onyesha kuwa matokeo hayajakamilika.

Hitimisho: Andika maelezo mafupi iwezekanavyo. Usitaje tena data iliyojumuishwa kwenye matokeo.

Sehemu hii inaweza kujumuisha:

- Ufasiri wa matokeo muhimu na athari zake kwa huduma ya afya ya umma
- Hatua za afya ya umma ambazo zimependekezewa na/au zimetokelezwa kutokana na matokeo ya utafiti

Kumbuka: Huwezi kufanya mabadiliko kwenye ikisiri ya mwisho baada ya kuituma. Hata hivyo, kukiwa na mabadiliko makubwa baada ya kutuma ikisiri, mabadiliko haya yanapaswa kuangaziwa wakati wa uwasilishaji wa ikisiri.

Vigezo vya Utathmini

Kila ikisiri itatathminiwa na wakaguzi watatu huru kwa kutumia vigezo vifuatavyo:

- Utangulizi na mantiki ya utafiti
- Ufaafu wa mbinu
- Uwasilishaji wa matokeo
- Hitimisho na ufasiri wa matokeo
- Umuhimu katika afya ya umma
- Udhahiri wa jumla wa ikisiri
- Mambo mapya kwenye utafiti
- Ufaafu kwenye nyanja/mada ya kongamano

Kwa maelezo zaidi kuhusu Mkutano wa Pili wa Kimataifa wa Afya ya Umma Afrika, tembelea www.cphia2022.com au utume barua pepe kwa Shingai Machingaidze kupitia MachingaidzeS@africa-union.org.

Kwa maswali kuhusu mpango wa ikisiri, tafadhali tuma barua pepe kwa CPHIA2022Abstracts@globalhealthstrategies.com.